

Visoki predstavnik donio odluku o provedbi Odluke Ustavnog suda AP-953/05

Visoki predstavnik Christian Schwarz-Schilling danas je donio odluku koja se tiče provedbe Odluke Ustavnog suda Bosne i Hercegovine o žalbi Milorada Bilbije i ostalih.

[Odluka](#) stupa na snagu odmah.

Odluka Ustavnog suda vodi se pod brojem AP-953/05 i datirana je 8. jula 2006. i tiče se žalbi Milorada Bilbije i Dragana Kalinića, koje je smjenio visoki predstavnik 2004. godine.

Ovom odlukom uspostavlja se proces kojim će organi vlasti Bosne i Hercegovine biti u stanju ispoštovati Odluku Ustavnog suda na način na koji neće biti prekršene međunarodne obaveze Bosne i Hercegovine koje proističu iz Dejtonskog sporazuma i Povelje UN-a.

Prema ovoj odluci, Predsjedništvo Bosne i Hercegovine će uputiti visokom predstavniku, kao predsjedavajućem Upravnog odbora Vijeća za implementaciju mira, sva pitanja istaknuta u pomenutoj Odluci Suda koja bi trebali razmatrati međunarodni organi navedeni u pomenutoj Odluci.

Nadalje, svaka radnja koju preduzme bilo koja institucija ili organ u Bosni i Hercegovini u cilju uspostave bilo kakvog domaćeg mehanizma kontrole odluka visokog predstavnika smatrati će se pokušajem da se ugrozi provedba civilnih aspekata Općeg okvirnog sporazuma za mir u Bosni i Hercegovini, i tretirati kao takva.

Odlukom se nadalje potvrđuje da će se bilo koji postupak pokrenut pred bilo kojim sudom u Bosni i Hercegovini, kojim se dovode u pitanje odluke visokog predstavnika o sankcioniranju

pojedinaца na osnovu njihovog kršenja Dejtonskog mirovnog sporazuma, smatrati nedopustivim, osim ukoliko visoki predstavnik za to izričito ne da svoju prethodnu saglasnost.

Na osnovu ranije prakse, visoki predstavnik će i dalje dozvoljavati da domaći pravosudni organi razmatraju zakone koje on donese umjesto zakonodavnih organa vlasti.

Visoki predstavnik još jednom izražava svoju podršku Ustavnom sudu i naglašava da odluke ovog Suda trebaju biti implementirane u skladu s Dejtonskim mirovnim sporazumom.

Institucije Bosne i Hercegovine imaju obavezu, prema Dejtonskom mirovnom sporazumu i različitim Rezolucijama Vijeća sigurnosti UN-a, da poštuju i provode odluke visokog predstavnika.

Odluke visokog predstavnika su zasnovane na međunarodnom pravu, Dejtonskom mirovnom sporazumu i Rezolucijama Vijeća sigurnosti UN-a. Institucije Bosne i Hercegovine ne mogu osporiti ili dovesti u pitanje ove odluke, kao takve.

Odluka Suda ne utječe na odluke visokog predstavnika i pojedince koje je on svojim odlukama smijenio s javnih funkcija, uključujući i gospodina Milorada Bilbiju i gospodina Dragana Kalinića, te za njih i dalje važe izrečene zabrane, sve dok o tome drugačije ne odluči visoki predstavnik.